

E ta keda violencia sexual

Compañero di scol of desconoci

HOPI biaha, violencia sexual ta wordo presenta como algo cu ta sosode ora un adulto ta abusa di su poder riba un mucha. Pero tin un realidad cu demasiado scol, mayor y comunidad ta ignora: violencia sexual ta sosode tambe entre e hobennan mes. Ora e agresor ta un compañero di scol, un compañero di team of un supuesto amigo, e ta keda violencia sexual. E no ta un wega, no ta “*drama*,” y sigur no ta “*cos di mucha*.”

Violencia sexual entre hoben ta bini den hopi forma. E por ta harasmento — chansa sexual, mishimento indesea of comentario explicito grita den gang. E por ta coercion — presiona un persona pa manda potret intimo of haci actonan cu e no kier. E por ta un asalto directo — forsa actonan fisico sin consentimiento. **Y cada bes mas, e ta sosode online:** Un potret priva comparti sin permiso, un menasa pa ‘lek’ imagen of un ola di rumor humiyante plama den un ‘group chat’.

No importa e luga, e liña comun ta cla: Un hende su limitenan a wordo crusa, y su derecho riba siguridad y autonomia a wordo viola.

E peligro no ta sinta solamente den e actonan mes, pero den e manera cu adulto y compañeronan hopi biaha ta excusa nan. Un maestro por bisa, “*Nan no tabatin mal intencion*.” Mayornan por hisa schouder y bisa, “*Ta djis un fase*.” Amigonan por keda keto, cu miedo di daña e grupo. Cada excusa ta crea un cultura unda violencia sexual ta wordo normalisa, minimalisa y ripiti.

Edad no ta haci e seriedad di e acto menos. Un hoben di diescuater aña cu ta haras un compañero di klas ainda ta cometiendo acoso. Un hoben di diesseis aña cu ta agredi un compañero ainda ta cometiendo un asalto. No ta importa si e agresor tin 14 of 40 aña, e limite cu a wordo crusa ta mescos. E violacion ta mescos.

Tecnologia solamente a intensifica e problema. Loke antes kisas tabata wordo murmura of scondi, awor ta plama instantaneamente. Un solo imagen por circula den henter un comunidad escolar den minuut. Un video humiyante por keda online pa añanan. E argumento cu e accionnan aki ta “*djis comportacion di teenager*” ta deshaci ora e daño ta persigui un hoben te den su bida adulto.

Tin un liña cu nos no por haci vago: Consentimento no ta negociabel. Y e les ey mester wordo siña for di tempran.

• **Scolnan** mester stop di ignora incidentenan y mester imple-



menta un maneho di cero tolerancia.

- **Compañeronan** mester reconoce cu silencio ta haci nan complice y cu papia ta un responsabilidad.
- **Famianan** mester tin combersacionnan honesto tocante respet, consentimiento y limite hopi prome cu e hobennan cuminsa un relacion.
- **Comunidad** mester manda un mensahe consistente: no tin un version mas leve di violencia sexual djis pasobra e agresor ta hoben.

Violencia sexual entre hoben ta un reto pa nos zona di confort, pasobra e ta nifica confronta e hecho cu daño por bini for di den e comunidadnan di hoben mes. Pero e punto final ta cla. Violencia sexual ta violencia sexual. No ta importa si ta un compañero di scol, un amigo of un desconoci. No ta importa si e agresor tin 15 of 50 aña. No tin excepcion, no tin excusa y no tin definicion alternativo.

Mas lihe cu scol, mayor y compañeronan compronde e berdad ey, mas lihe nos por cuminsa kibra e ciclo. Te e tempo ey, ignora e abuso como “*cos di mucha*” solamente ta segura cu e violencia ta sigui.